

HEADLINES (EVENING)

1. Chief Minister Pu Lalduhoman thlai thar phurh chhuahnan leh lo hla deuh te kal nan mono rail hman a ni dawn a ti.
2. Mizoram State Anti-Tobacco Day vawi 13-na chu vawiin khan state chhung hmun hrang hrangah hman a ni.
3. Naktuk atanga New Delhi-a BRICS Summit vawi 18-na hmang turin ruahmanna peihfel a ni ta.
4. India chuan hmeichhe chhul cancer thlen thei natna laka venna Human Papillomavirus (HPV) vaccine nuai 80 chuang a pe tling tawh..

<><><>

CM

Chief Minister Pu Lalduhoman thlai thar phurh chhuahnan leh lo hla deuh te kal nan mono rail hman a ni dawn a ti.

Hnahthiala ZPM South Tuipui Joint Block Conference vawiina a hmanpuinaah he thu hi sawiin Pu Lalduhoma chuan Chief Minister Innovation hnuaiah mono rail hi kalpui turin hma an la a ti a, Thenzawl rubber huan hnaih lamah an ti chhin phawt dawn tih sawiin, ram tha, kawng awm silo te thlen zung zung na tur a ni a ti.

Chief Minister chuan tunah hian nasa zawka Agriculture Link Road lai turin ruahmanna siam a ni a ti a, Thal chho intan turah hian tanin, Horticulture leh Agriculture Link Road atan cheng 115 ve ve dah a nih tawh bakah tunah hian cheng vbc engemawzat an pe leh dawn bawk a ti.

Chief Minister chuan ZPM sorkar in kuthnathawktute a ngaih pawimawh avangin a tir te atangin thlai chi nga lei a ni a, tunah hian thlai dang lei turin an in ruahman leh mek a ti a, Thlai engemaw zahah thlai luman siam a nih thu te, ran luman te an kalpui bawk a, kum khata thar thei thei chi hrang hrangah pawh hmalak a ni a, sangha intodelh tumin tan lak chhoh mek a ni a ti.

Chief Minister chuan Mizoram sorkar in inkal pawhna chi a ngai pawimawh a, tunah hian chhak leh thlang zawnga motor kawngpui a kal theih nan hma lak a ni a ti bawk a, airport siamna tur pawh hmun pahnih-ah ruahman a ni a, Northeast corridor siam turah NE State pariat tana din-ah chairman a nih thu te hei hi khawvel dang nena inpawhna tur ngaihtuatu a ni dawn a, Rail kawng te pawh tih belh zel a ni tur thu a sawi.

He hunah hian South Tuipui bialtu MLA Pu Jeje Lalpekhlua, Minister Pu B. Lalchhanzova, Assembly Deputy Speaker Pu Lalfamkima, HPC Vice Chairman Pu V. Malsawmtluanga te leh an party hruaitu dang te an tel a ni.

<><><>

LO ZAWH PUI 2026 @ SAICHAL

Tourism Minister Pu Lalngchinglova Hmar chuan Mizo nuna bet tlat lo zawh chu tunlai mil deuha tih theih a ni em, tih an enchhin hnuaah zawngchhang tlak nia an hriat avangin sawrkarin hmalakna a kalpui a ti.

Vawiin khan Argiculture leh Tourism department-te tangkawp huaihawtin Saichal Zaupui-ah Lo Zawh Pui hman a ni a, Pu Lalngchinglova chuan Department dang nen tangkawpa thawkho tura ruahman niin mipui ten hamthatna an hmuh theihna tura ruahman a ni a ti.

Tourism Department leh Agriculture & Farmers' Welfare Department tangkawp buatsaih 'Lo Zawh Pui' Saichal Zaupui a neihah hian a huhova hlo thlawh a ni a, Zau Pui Lo Zawh Concert te buatsaih a ni a, Power & Electricity Minister Pu F. Rodinglana pawhin a hmanpui a ni.

Pu F. Rodingliana chuan thingtlang Lo Neih chu Mizo nuna bet tlat ani tiin kalsan lova tunlai mila hlawk zawka tharchhuah a pun theih nana her rem a pawimawh tih a sawi. Agro Tourism chawikan nan Lo Zawhpui buatsaih chu Mizoram hmun hrang hrangah hlut a hlawh chho mek tih sawiin tun aia hmasawn zawk leh khualzin hip thei tura tan lak a pawimawh thu a sawi a ni.

<><><>

TRAFFIC COORDINATION COMT

Chief Secretary Pu Khilli Ram Meena kaihhruaiin Coordination Committee on Traffic Management vawiin khan MINECO ah an thukhawm a, Mizotaxi app hman theiha tlangzarh a nih hnua Two Wheeler Taxi leh Four Wheeler Taxi inziahlulh dante leh hmangtu awm dante thlirlet niin, inziah luh hun pawh sei rawtna chu sawi ho a ni.

Meetingah hian Transport Department Secy Pu C.Lalruaia chuan vawiin thlengin Mizotaxi App-a inziak lut lirthei 1570 an awm tih a tarlang a. Heng zinga 397 chu Four Wheeler Taxi an ni a, 1149 chu Two Wheeler Taxi niin Autorickshaw 24 an tel bawk a. Mizotaxi App kaltlanga Taxi hman tum chhinchhiah zat chu 28,553 a ni a ti a. Vawiin hian Taxi Driver on-line 279 an awm tih a sawi bawk.

Thutkhawmah hian Mizotaxi app chu State Transport Authority-in Taxi rate a bithliah dik tak hman a nih theih nante, Taxi hmangtu passenger-te him zawk nana hmanraw tangkai a nih theih thute leh Aizawl khawpui chhunga Taxi Parking Area tawt lutuk tih ziaawm nana hmanrua a nih theih dante an sawiho a. Inziah luh hun pawh sei chhung khan Taxi inziak lut an thathnem thu sawi niin mipui pawhin Apps hi an hmelhriat tanin an hmang thiam chho tan an ti a. Hemi avang hian Apps-a in-register duh tan thla 3 chhung hun hawn belh rawtna chu thutkhawmah hian sawi ho a ni.

<><><>

ANTI TOBACCO DAY

Mizoram State Anti-Tobacco Day vawi 13-na chu vawiin khan state chhung hmun hrang hrangah hman a ni.

Aizawlah chuan DHME Auditorium-ah Health Minister Pi Lalrinpuii hoin hman a ni a, Minister chuan, zuk leh hmuam do a, fihlim thei turin chhungkua atanga bul tan a pawimawh tih a sawi a. Nu leh pa ten mahni fate enkawl that a, midang kuta dah mai lovin mahni fate chu ngaihpawimawh bera neih a ngai tih a sawi. Chhungkua atanga bul tan loh chuan engtikah mah ruihhlo sim a, ram siam that theih a ni lo tih sawiin, a dona kawngah mimal, sorkar, kohhran leh khawtlang tanrual vek a ngai tih a sawi bawk.

Minister chuan kohhran a rawngbawltu leh thalai hruiatu atan pawh zuk leh hmuam fihlim ni thei se tih chu a duhthusam a nih thu a sawi a, tih takzeta do a nih loh chuan sim mai theih chi a ni lo tih a sawi. Vantlang hmuna meizial zu te hrem chungchangah pawh dan leh thupek kenkawh kawngah nasa zawka tan lak a, hmasawn a ngai tih a sawi bawk.

National Tobacco Control Program State Nodal Officer Dr Zoramthangi sawi danin, zuk leh hmuam tite zirchianna Global Youth Tobacco Survey hnunung berah Mizorama zirlai za zela 58 ten zuk leh hmuam an ti a, an zinga zaa 42 chuan meizial an zu a ni. Zirlai zingah zuk leh hmuam ti chhin tawh an tam avangin zirna hmunah a that lohzia inzirtirna tar leh, a la ti ve loten an tih loh zel theihna tura zirtirna leh enkawl na neih a pawimawh hle tih tarlan a ni bawk.

Kum 2013 atang khan Mizoram State Anti-Tobacco Day hi hman tan a ni a, Mizoram hi India rama State Anti-Tobacco Day hmang hmasa ber a ni. State Anti-Tobacco Day hi September ni 11-a hman thin tura ruahman a nih angin kum 2013 atangin kum tin hman thin a ni a, kumin hi a kum 13-na a ni.

<><><>

GAUHATI HC JUDGE VISIT KOLASIB

Gauhati High Court, Judge Justice Nelson Sailo, Mizoram State Legal Services Authority Executive Chairman ni bawk chuan vawiin khan Kolasib a tlawh a, pawikhawihna thlengah a tuartute tan 'crime victim compensation scheme' hnuaiah tanpuina a sem.

Tun tumah hian Kolasib District chhunga mi 29 hnenah compensation hi pekchhuah a ni a, pawisa pekchhuah zawng zawng zat hi a vaiin cheng vbc 1 nuai 28 leh sing 5 a ni. Gauhati High Court Judge chuan compensation semchhuah te chu

pawikhawihna tuar naupangte enkawlina tur a ni tih a sawi a, pek an nih ang taka hmanng ngei turin nu leh pate a chah a ni.

Kolasib CJM Pu V. Vanlalhriata kaihhruai hun hmanaah hian District Bawrhsap Pu H Dolianbuaia leh Kolasib SP Pu Lalrinpuia Varte te pawh an tel a, Kolasib bawrhsap chuan, Mizo chhungkaw tam tak chu mamawh aia duh zawng lei mai thin an ni tih sawiin financial literacy campaign pawh nasa lehzuala neih a tul a ti a. Tun tuma sem crime victim compensation chu naupangte tuamhlawmna tur, anmahni tana ruahman a nih angin naupangte enkawlina atan hmanng turin a chah a, lirthei leina leh chhungkaw tana pek an ni lo tih a sawi bawk.

Gauhati High Court Judge hian District Prison and Correction Home pawh a tlawh nghal a, tangte chu an awm hlenna tur a ni lo tih hrilhin an chhuah hunah pawh khawtlang tana mi tangkai nih tum turin a chah a ni. Tangte tan tui tihthianghlimna leh tih vawhna a pek bakah nu te tan vanga jaila awm naupangte in awmtleina tur inkhuallemna hrang hrang a hlan nghal a ni.

<><><>

SAMART SCHEME

Mizoram KVI Board Chairman Pu C.Lalremliana chuan sorkar hmalaknaa thiam thil peipunna leh leh intuaihriamna Skill Development training ah mipa aia hmeichhia an tam zawk zel chu a khawharthlak a ti.

Central Scheme SAMART scheme hnuaia thla thum chhung a puanthui zir zo mi 23 te certificate hlanna leh hmanrua semna hun Lungleia vawiina an hmannah he thu hi sawiin Pu Lalremliana chuan mipa ten beautician, chhang siam, puanthui te hi zir nachang an hriat a ngai tih sawiin harh thar a ngai a ni a ti.

MKVIB CEO Pu Hnamhlunchhunga kaihhruai he inkhawm hi Lunglei Municipal Council Chairman Pu Lalzuithangan a hmanpui a, Pu Hnamhlunchhunga puanthui zir chhuak te chu khawl leh pawisa an pe a, a chhunzawm leh zel a chu an kutah a awm tawh tih sawiin PMEGP Loan te Bank ah dilin Bana Kaihruai Policy hnuaiah KVI chuan a lo tanpui thei reng a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

ASSEMBLY SUBJECT COMT

Mizoram Legislative Assembly-a Committee peng - Subject Committee II te chuan an Chairman Lt. Col. Clement Lalhmingthanga, MLA hovin ramchhung khawpui hrang hranga Mizoram House dinhmun zirchiang turin an zin a.

Member te hi MLA Pu H. Ginzalala, Dr.R. Lalthangliana, Dr. K. Beichhua, Pu R. Rohmingliana leh Pu Lalramliana te an ni a, naktuk thlenga neih tur he Spot Study Visit-ah hian MLA rualte hian - Bengaluru, Mumbai, Kolkata leh Guwahati-a Mizoram House-te an fang kual a. Heng khawpui hrang hranga Mizo mipuite tana Mizoram House pawimawhna leh tangkai dan te, Mizoram House kalpui a nih dan te, a dinhmun mekte bakah, harsatna an tawh leh hmasawmna awm theite an zir chiang a. Committee zir chianna Report leh rawtna an neihte chu sawrkar bawhzui turin Assembly Session-ah pharh a la ni leh dawn a ni.

MLA te hian heng khawpui hrang hranga Mizo awmte kawmin inenkawl tura phai ram pana kal, Mizoram House-a damlo thleng mekte pawh tlawh kualin an khawsak dan dinhmunte an en bawk a ni.

<><><>

BRICS

Naktuk atanga New Delhi-a BRICS Summit vawi 18-na hmanng turin ruahmanna peihfel a ni ta.Summit-ah hian Prime Minister Narendra Modia chuan BRICS_a a thawhpui ram hruaitute Russian President Vladimir Putin, Chinese President Xi Jinping, South African President Cyril Ramaphosa, Egyptian President Abdel Fattah El-Sisi, Indonesian President Prabowo Subianto, Iran President Masoud Pezeshkian, Crown

Prince of Abu Dhabi Sheikh Khaled bin Mohamed bin Zayed al Nahyan leh ramdang hruaitute a lo mikhual dawn a. He Summit ah hian khawvel ram thanglai ram 11 an tel dawn a. An zingah hian Brazil, China, Egypt, Ethiopia, Indonesia, India, Iran, Russia, Saudi Arabia, South Africa, leh UAE an tel dawn a. Belarus, Bolivia, Cuba, Kazakhstan, Malaysia, Nigeria, Thailand, Uganda, Uzbekistan, leh Vietnam te chu BRICS thawhpui ram an nih angin an tel ve bawk ang. BRICS hi atirah BRIC tih hming pu in ram pali intelkhawm Brazil, Russia,India, leh China ten kum 2001 a an din a ni a. South Africa in 2011 ah zawm ve in BRICS tia thlak a ni a. Tun dinhmunah member ram 11 an awm tawh a. Khawvel mihring zaa 49 hi BRICS ramchhungah an cheng a. Khawvel sum dehchhuah GDP zaa 40 hi BRICS ramte thawhchhuah a ni.

<><><>

HPV

India chuan hmeichhe chhul cancer thlen thei natna laka venna Human Papillomavirus (HPV) vaccine nuai 80 chuang a pe tling tawh. HPV kaihnawih natna inven kawnga sawrkar hmalakna tih chak kawngah he hlawhtlinna hi a pawimawh hle a. Union Ministry of Health and Family Welfare chuan National HPV Vaccination Campaign hnuaiah kum 2026 February thla atangin HPV vaccine hi pek a ni a ti a. Gujarat, Uttar Pradesh, Madhya Pradesh leh Mizoram te chuan HPV la tura target zaa za an pe kim thei a. Hetihlai hian Bihar, Andhra Pradesh leh Assam ten zaa 90 an pe tawh a. Uttar Pradesh hian pe hnem berin tleirawl nuai 22 an pe tling tawh a ni.

<><><>